

Êzdiyatî û pîroziya ciyografiya çarşemê

Hoşeng Broka

hoshengbroka@amude.com

Yek ji serkeftîtirîn demên xwedawendane, ku di giyanê bawermendê êzdî de, wek demeke „tekûz“ „kamil“, „serkeftî“ û „bijarte“ tê pîrozkirin, dema çarşemê ye. Ev dema „serkeftî“, „rasteqîne“ û „bijarte“, di mîtolojî û teyolojiya êzdiyatîyê de, bi gelek nav û şênên curbecur tê binavkirin:

Dema çarşemê/ cejna çarşma sor, dema destpêkan/ cejna sersalê, dema çarşma nîsanê, dema Basimbarê, dema Hêkesorê, dema xwedawendan/ cejna Tawisî Melek.....htd.

Êzdî vê demê angorî salnameya Grîgorî/rojhilatî¹, her sal di yekemîn çarşema meha nîsanê de, pîroz dikin û wê demê di kesayetiya xwe de, wek proseseke bawermendane dûbare dikin, û herweha giyanê xwe bi giyanê xwedawendên xwe re bi yek dikin. Li ser astekî xwedênasî (teyolojî), mirov dikaare vê demê wek dema kiasguherîna herî „dirêj“, „fereh“ û „bilind“, li qelem bide, çimkî di vê dema çarşembeyî de, xwedê/ xwedawend û ademîzad tîqe-tîqe rastî hev tîne û herwisa li hev mikur tîne. Wate bi qasî ku ew li ser astê xwedawendane dema asîman e, ewqasî jî ew li ser astê ademîzadane dema erdê ye. Bi gotineke din ew dema pêrgîhevhatin û di-hev-re-derbasbûna giyanan e: Giyanê xwedawendan û giyanê ademîzadan.

Ev dem di kok, bineret û bingeha xwe de, sê demên xwedawendane li ser sê astan navdilî xwe dike:

- Roj/ Çarşem.
- Meh/ Nîsan.
- Demsal/ Buhar.

Gelo çima û ji bo çi ev sêgoşîya demê; ya pîroz?

Aya çine ew dûmahîkên mîtolojî û teyolojî; yên li dûv pîrozwegirtina vê dema sêgoşane; ya herî pîroz di ciyografiya pîroziyên êzdiyatîyê de?!

Aya ji bo çi ev çarşema destpêkane/ çarşema Tawisî Melek wek destpêka salnameya êzdiyane tê qebûlkirin???

Çarşem di ciyografiya pîroziyên êzdiyatîyê de, xwedî pileyeke xwedawendane, taybetmend û bijarte ye. Ew li gorî baweriya êzdiyan, dema „Peyva pîroz“, „fermana pîroz“, „giyanê pîroz“, „dahatina pîroz“, „afrandina pîroz“, „dê û bavên pîroz“, „pêwendiyên pîroz“ û „destpêkên pîroz“ e. Lewma ew wek roja mişt „bihna xwedê/ Tawisî Melek“, „axaftina xwedê“, „kesahiya xwedê“, „bêrîkirina xwedê“, „şaz û qudûmên xwedê“ „eşqa xwedê“ û „serborekên xwedê“ di mîtolojiya êzdiyatîyê de, tê xwendin.

Ji seqa, rewîştûtîtal û dabûnerîtên vê cejnê diyar dibin, ku ew dema herî „hêzdar“ û bê hempa ye: „Destpêkirina hêzdar“, „Afrandina hêzdar“, „xwedawendiya hêzdar“, „ademîzadiya hêzdar“, „hevdîtina hêzdar“.....htd. Lewra Mirovê êzîdî hewl dide, ku di rabûn û rûniştinên xwe; yên vê dema çarşembeyî de, dema xwe; ya „ademîzadane“, „dîrokî“, „lawaz“ û „girtî“, bi dema xwedawendên xwe; ya „xwedawendane“, „mîtiyane“, „serasayî“, „hêzdar“, „reha“ û „berdayî“ re, hemdem bike.

¹ Di 1582 an de, ev Salname(Grîgorî) li ser destê papa Grîgorê sêzdemîn, hate sazîkirin. Ev salname jî bi 13 rojan li paş salnameya zayînî ye.

Herçiqasî ku çarşem wek aliyê herî pîroz, di êzdiyatîyê de, werê liqelemdan, û bi xemleke êzdiyane a xurû xwe bide pêş jî, lê ev roj wek dema helkeftinên pîroz û xwedawendane, hîn xwedanciyekî berz û bayexdar e, di paşxane û bîreweriya kurdî a giştî de. Çarşem li seranserî asîmanên kurd; yên mozayîkane: ji rojhilat heta bi rojava, û ji bakur heta bi başûr, wek dema giyanê pak û pîroz/ giyanê bilind/ giyanê fereh/ giyanê xwedawendane, tê pejirandin:

*Çarşeme xweş çarşeme lo çarşem e
mala bûkê l'ber çeme lo l'ber çem e
bûk bi zavê re bi kene lo bi ken e*

*Çarşem rojek pîroze lo pîroz e
serê zavê b'koloz lo b'koloz e
zava li bûkê bi doze lo bi doz e*

*Çarşem rojek çi xweşe lo çi xweş e
xêl wî hatin bi meşe lo bi meş e
anîn bûkek keleşe lo keleş e*

*Çarşem roja xwedaye lo xwedaye
deryê xeman dadaye lo dadaye
kêf û xweşî tê de ye lo tê de ye²*

Ev sirûd/ dirûze; ya ku li seranserî „kurmanciyê“, di demên bûkxwestin, xêlvani, tidark, şahî û dawetan de, dihate û hîn jî tê nuhêrandin, keskahî, bilindahî, ferehî, pîrozî û bayexdariya çarşemê wek demeke „serkeftî“ û „bijarte“, di rabûn û rûniştina mirovê kurd de, û herweha di bîreweriya wî a giştî de, nîşan dide.

Ev bîreweriya evradar bi „aliyê çarşemê“, herçiqasî ku ew taybetmendî û reseniya xwe ji mîtolojî û kelepûrê êzdiyatîyê digire û xwe bi xemleke êzdiyane a xurû dide pêş jî, lê mirov dikare vê wek bîreweriyê desthildar li seranserî aliyên kurd û herweha ciyografîyên wî; yên mozayîkane, li qelem bide.

Di dema ku çarşem di gelek herêm, navçe û komelgehên kurdiyane de, wek rojê xwedawendane û pîroz tê wergirtin³, bêyî ku mirovê kurd (Kurdê ne êzîdî) di wan komelgehên de, di wateya vê rojê de; ya teyolojî û mîtolojî de bigihê, mirov dibîne ku êzdiyatî (ol, teyolojî û mîtolojî) pîrozwegirtina çarşemê wek proseseke xwedawendane/ roja xwedê û Tawisî Melek, li ser her êzîdiyekî/ ê, daku ew di vê demê de/ dema herî serkeftî, bişê giyanê xwe bi giyanê „Tawisî Melek“ re bi yek bike, wek erk û wezîfeya oldarî a herî pîroz, ferz dike.


Çarşem di êzdiyatîyê de, berî her tiştî, wek roja „Tawisî Melek“ tê qebûlkirin. Ew dema herî destpêkane ye, anku ew destpêka destpêkan e.

Çarşem demeke vekirî, mîtiyane û lîtorjiye. Li gorî mîtolojiya êzdiyatîyê, di vê demê de, her tişt dikare xwe bi destpêkên xwe re bi yek bike. Ew dema xwedûbarekirin û xwevgerandina pîroz ; a reha û bê sînore.

Eger ku em xwendineke stûnî (vertikal) û rasterast (horizontal) ji vê dema çarşemê; ya efsaneyî re bikin, em dê bibînin, ku ew demeke bela-wela ye di navbera du gerdûnan (Kosmos) de: Gerdûna mirovane, û gerdûna xwedawendane.

² F. Huseyn, Sagcin: çarşem, kovara navenda çanda mezopotamya (NÇM), hejmar 12, R. 41.

³ Çarşem di komelgehên kurdî de bi gelek navên curbecur tê binavkirin wek: Çarşmsor; çarşemreş; roja xweda, roja firîştayan....htd.



Çarşema aferînê

Çarşem di mîtolojiya êzdiyatîyê de, hindek caran wek roja destpêka dawiyê: Destpêka aferînê û dawiya taristana gerdûnwerî, destpêka nijinandinê û herweha dawiya şêlûbêliyê, tê xwendin. Ew (Çarşem) roja tewawbûna xwedawendan ji kar û barê aferînê ye, herweha ew roja bidawîanîna şêlûbêliya gerdûnwerî ye.

Di „Dû`aya aferînê“ de weha hatiye:

*Xwedawendê min danî esas e
şemiyê lê kir kiras e
çarşemê kire xelas e⁴.*

Ji vê sebeqê tête famkirin, ku çarşem roja herî pîroze; ya ku tê de bavçakên mirovahiyê; yê destpêkê/ xwedawendên destpêkê, Gerdûn, xwerist û mirov afirandine. Weha çarşem dibe roja kamilbûnê: Kamilbûna gerdûn, xwerist û mirovî. Anku ew dema kamilbûna sêgoşîya kosmogonî û xwedawendane ye.

⁴ Ev duwa ji zarê zanyarê ola êzîdîyan hêja Feqîr Hecî hatiye wergirtin.

Binêre Hoşeng Broka: Dîrasat fi mîsolojiya eldiyana alêzîdiya, çapa taybet, elmanya, 1995, R. 152.

Çarşema miriyan

Çarşem di mîtolojiya êzdiyatîyê de, wek roja „serdana miriyan bo zindiyên wan“, tê liqelendin. Lewra çarşem wek demeke evradar, ji bo „şîv û taştêyên xwedawendane“, ku êzîdî wan serqeyî serê miriyên xwe dikin, tê terxankirin. Çimkî bawermendên êzîdî wisa bawer dikin, ku di vê roja pîroz de, wê miriyên wan rûberên mirinê bi giyanekî ji çarşemê bibirin û werin serdana wan. Goristan di hizir, bîr û baweriya êzîdiyan de, sax û zindî ne. Lewra em dibînin, ku têkiliya mirovê êzîdî/ yê zindî bi miriyên wî/wê re têkiliyeke zindî û brdewam e. Ev têkilî di demên cejn û erefatan de, wek têkiliyeke berz û desthilatdar di kar û barê êzîdiyan de, tê xwiyakirin. Di van demên pîroz û çarşembeyî de, ciyografiya mirin û jiyanê, di giyanê bawermendê êzîdî de, bi yek dibe. Çu sînor di navbera goristanên miriyan û „goristanên zindiyên“ de namînin: Êdî mirî û zindî bi hev re dixwin, vedixwin, cejnan pîroz dikin, bêriya hev dikin û xewnan dibînin...!!!

Êdî ev demên pîroz di mîtolojiya êzdiyatîyê de, di serê wan de dema çarşemê, dibin berzex ji bo derbasbûnên pîroz, di navbera mirov û xwedawendane de. Herweha mirina êzîdiyekî/ ê di tixûbên ciyografiya çarşemê de, yek ji mirin û xwedawendane ye, li gorî baweriya êzîdiyan. Çimkî miriyê/ a ku teslîmî êvara/roja çarşemê di mîtolojiya êzdiyatîyê dibe mêvanê giyanê Xwedawendê çarşemê; yê hevalê Melek.

Çarşema hêminî û bînvedanê

Li gora mîtolojî û baweriya êzdiyatîyê, her tişt di roja çarşemê de, di derya hêminî û vehisandineke gerdûnwerî de, avjen dike. Anku ew roja „Nirvana“⁵ êzdiyane ye, daku mirovê êzîdî kar û barê ku Xwedawend di destpêkê de pê rabûwine, di vê dema pîroz de dúbare bike û herweha kirasê xwe di giyanê Xwedê/ Twisî Melek de biguherîne.

Êzîdî pêrabûna hemî kar û baran, xweşuştin, cilşuştin, kolana erdê, rêwingî...htd, di êvar û roja çarşemê de, wek gunehêkî mezin li qelem didin. Çimkî çarşem roja dawîye di heftiya destpêkan de; ya ku tê de xwedawendên gewre/ bavçakên destpêkê, ji kar û barê afirandinê tewaw bûne. Lewra ew xwedawendên ku ji aferîna gerdûn, xwerist û mirovî westiyane, elbete wê pêwîstî hêminî û vehisandinê bin. Afrandina gerdûnê bi giştî wek prosesê xwedawendane, li gora hizra êzîdiyan ne karekî hesan bûye. Ew karekî weha fereh, weh dirêj û weha bilind bûye, bi qasî ferehî, diêjahî û herweha bilindahiya xwedê.

Bi vî awayî çarşem di mîtolojiya êzdiyatîyê de bûye dema vehisandina xwedawendan û dûrbûna wan ji „yên din“ û ji her tiştî, daku ew ber bi xwe ve kesk bibin. Herweha çarşem li ser astê ademîzadane, bûye dema vegera sermedî, dúbarekirina karên afrandina pîroz û pişkdariya mirovan di çêkirina dîroka xwedawendan de.

Çarşema Tawisî Melek

Aliyê herî pîroz di dema Çarşemê de ewe, ku ew dema dahatina Tawisî Melek, wek yekemîn mizgînxêrê jiyanê, bo erdê ye. Ew dema kêfxweşiya gewretirîn sêgoşiya kosmogonî ye (Gerdûn, xwerist, mirov), ji bo pêşwazîkirina hatina wî; ya evradar. Lewra dema Çarşemê, serkeftîtirîn dem e, li seranserî mîtolojiya êzdiyatîyê. Ew bi vê taybetmendîya xwe; ya evradar û xwedawendan e, hildipirke pileya dema kosmogonî a giştî û reha, daku hemî çarşemên dahatû paş Çarşema destpêkane/ çarşema serê nîsanê, bibin ciyografîyeke xwedawendane, ku bawermendê êzîdî kendûkozên pîroziyên xwe û sîmayên Tawisî Melekê xwe, li ser nîgar bike.

⁵ Nirvana di Bûdîzmê de, pileya herî pîroz; ya xwedanasi/ Bûdanasi û rastinasî ye. Nirvana ji bo bawermendên bûdîst, bexteweriya herî gewre û bayexdar e. Çimkî li gorî pend û şîretên BÛDA ancx di cîhaneke nirvanewî de, giyanê erdê/ mirov û giyanê asîman/ Xwedê, bişên hev hembêz bikin.

Di efsaneya Çarşemê de, weha hatiye:

Dema ku dunya taristaneke gerdûnwerî bû, û hîn erd û asîman ji hev cuda nebûbûn, Tawisî Melek bi kêsîmê „Teyr Tawis“ li ser dara „Herherê“; ya sermedî, danî. Bi dahatina wî xwedawendê gwere re, her tişt bi şêweyekî tekûz û kamil, hate afirandin. Ew dema destpêkane dema Çarşema yekemîn ji meha nîsanê bû.

Evradariya xwedawendê bê hempa/ Tawisî Melek di efsaneya Çarşemê de bi taybetî, û di mîtolojiya êzdiyatîyê de bi gelemperî, vedigere wê yekê, ku ew berî her tiştî çalaktirîn û livbartzirîn xwedawend e, di kar û barê afirandina destpêkan de: Destpêka her tiştî.


Ev rola Tawisî Melek; ya pîroz, wek xwedawendekî kartêker û çalak, evradariyeke din li ser astê sêgoşîya bûyerê (Dem, cîgeh, çalakî/kesayetî), pêwîst dike.

Sêgoşîya bûyera çarşemê a xwedawendane:

Dema xwedawendane (D. X.) = Çarşema serê nîsanê (Ç. N.).

Cîgehê xwedawendane (C. X) = Dara Herherê (D. H.).

Çalakgerê xwedawendane(Ç. X) = Tawisî Melek (T. M.)



Dema xwedawendane

Evradartirîn dem di mîtolojiya êzdiyatîyê de, dema Çarşema yekemîn ji nîsanê ye. Û ji ber ku ew demeke zelal, hêzdar, bijarte û serkeftîye, êzîdî wê di giyanê xwe de dûbare dikin û herweha wê ji xwe re wek dema cejnan werdigirin. Êzîdî di vê dema Çarşemê de, di hemî rabûn û rûniştinên xwe de, zehir bi/ teqlîda xwedawendên xwe dikin û hemî karûbarên pîroz; yên ku xwedawend di destpêkê de pê rabûne, di atmosfêrkî mişt bêrikirina ebedê û sermedîbûna destpêkan, dûbare dikin. Çimkî dema ku mirov bi awayekî seqayane pişkdariyê di „dawiya dunyayê“ de û herweha di „nûkirina afirandina wê“ de, dike, wê çaxê ew li ser astekî nîşanewî dibe hemdemê wê dema destpêkane. Bi vî awayî ew careke din ji nû ve ji dayîk dibe û ew bi hemî hêza xwe; ya jîndar û çalakane, bêyî ku xumûm bigihiyê, vedigere ser tenga xwe; a berê, herwekî ew di kêlîka xwe ; ya jidayîbûnê de bê.

Cîgehê xwedawendane

Evradariya cîgeh elbete ji evradariya nişteciyê wî tê. Lewra Dara Herherê a sermedî; ya ku Tawisî Melek di dema destpêkan de, li ser daniye û ew ji xwe re wek nişngeheke reha bijartiye, yek ji navendên kosmogonî; yên herî pîroz, di mîtolojiya êzdiyatîyê de, tê liqelemdan. Li gora vê mîtolojiyê, Herher dara/ serûçîka kosmogonî a tenha û herî destpêkane ye, ku ji nav taristana geadûnwerî berz bûye.

Çalakgerê xwedawendane

Kesayetiya evradar; ya ku di ciyografiyeke evradar û atmosfêrekî pîroz de, hem li ser astê demê/ dema xwedawendane, hem jî li ser astê cîgeh/ cîgehê xwedawendane, tevbigerê, elbete wê di serencamê de, damezrêneriya kiryar û çalakgerê evradar, rû bide. Ev kiryar û

çalakerê pîroz jî wê kiryarekî weha be, ku ew bebetê xwedûbaerkirin û xwenûkirineke bê sînor be, di hemî rabûnûrûniştin û karûbarên ademîzadan de.

Ev seqayên dûbarekirina bûyerên destpêkane, û herweha dûşopandina xwedawendan/ bavçakên destpêkê, bi awayekî berz di cejna Tawisî Melek de, ji hêla bawermendên êzîdî ve, tîndî jiyandin. Bi nerîneke teyolojî, mirov dikare jiyandina û vejandina seqayên pîroz, ji hêla êzîdiyan ve, di dema Tawisî Melek de, wek hewldana hemdemkirina karûbarên xwe (wek ademîzad) bi karûbarên Tawisî Melek re (wek xwedawend), li qelem bide. Bi gotineke din, bawermendê êzîdî dixwaze di vê dema „serkeftî“, „bijarte“ û „tekûz“ de/ dema Çarşemê, dîroka xwe/ dîroka mirovane bi dîroka Tawisî Melek re/ dîroka xwedawendane re, bi yek bike.

Çarşema hêkan

Hêk yek ji berztirîn simbolên vê dema/ cejna pîroz e. Hêk li gorî seqayên vê demê, navend e, û her tişt hebûna xwe ji zîvirandina li dora wê, digire. Bi vî awayî hêk dibe destpêka her tiştî/ destpêka destpêkan. Erkên olî, di dema Çarşemê de, li ser her êzîdiyekî/ ê pêwîst dike, ku amadebûna hêkê ligel amadebûna reng, wek nîşana çarşembeke evradar, megîn, û hêzdar, amadebûneke hêzdar û berz be.

Aya çima û ji bo çi ye ev amadebûna hêkê; ya berz û hêzdar?

Ev amadebûn li ser astên simbolî û razwerî tê çi wateyê???

Gelo çi tîkilî di navbera vê amadebûnê/ amadebûna hêkê û amadebûna Tawisî Melek de, wek seqayeke çarşembeyî ji seqayên dûbarekirin û vegerandina dema destpêkê/ dema Tawisî Melek, heye???

Hêk li ser astê wê; yê simbolî, tê wateya puxtekirineke xweşik ji dema destpêkan re.

Ew kurtasî û puxteyîya çîroka gêtîyê ye. Ew kurtasiya dîroka ademîzadan û xwedawendan pêk ve ye.

Hêk giyanê gerdûnê û surra jiyane ye. Ew Destpêka destpêkane; ya ku ji bo her karekî aferînê dibe havên û hevîrtirş.

Pêwîstiya amadebûna hêkê di dema Tawisî- Melekî de, nîşaneke berze ji nîşanên amadebûna hêza rewayê; ya gerdûnwerî. Lewra hemî seqayên ku di çerxa hêkê de dizîvirin (Hêşkênandin/ hêkanê, mêşkanê, kabanê, tidarka rengan, pîrozwegirtina qaşûlên hêkan...htd), di dawiyê de, tîndî wateya amadekirina karekî pîroz; ku di dema destpêkê de, ji hêla çalakgerê/ kiryarekî pîroz ve, hatiye kirin.

Seqaya Hêşkênandinê/ Hêkanê; ya ku bi hêkê dest pê dike û bi wê tewaw dibe, seqayeke mişt e bi simbol û nîşanan.

Eger em xwendineke strûktûralîst ji van seqayan re, li ser astekî kûr û stûnî, bikin, em dê bigihin van encaman:

1. Şikênandina hêkê wek encama karûbarên seqaya „Hêkanê“, li ser astekî simbolî, tê wateya pişkdariyê di karûbarên neqibandî de/ neqibandina hêkê. Li ser astê simbolê, ev yek ji bo min tê wateya pişkdariyê di karûbarên aferînê de; yê ku xwedawendên destpêkê di dema destpêkan de, pê rabûne.

2. Pêşbirkî li ser şikênandina hêkê, di encamê de, pêşbirkîyeke li ser hêza rewayê û herweha şeyan li ser karûbarên aferînê (aferîna tekûz, kamil û giştî) û damezrandina jiyane. Lewma dema ku aliyê serkeftî di pêşbirkê de, îlana hêz û dijwariya hêka xwe li ser aliyê/ aliyên dorandî/ binkeftî, di hêkanê de, dike, ew bi xwe berî her tiştî îlana hêza rewayê/ surra sêgoşîya afrandinê/ afrandina mirov, xwerist û gerdûnê; ya „serkeftî“, „bijarte“ û „tekûz“ e.

3. Hêk li ser astê simbolî gerdûneke biçûk e/MIKROKOSMOS, ya ku ji wê gerdûna gewre/MAKROKOSMOS hatiye pijiqandin.

Bê goman qaşûlên ku ji karûbarên „Hêkanê“ derdikevin jî, di „dema çarşemê“ de xwedîwateyeke giring û pîroz in:

Ji ber ku ew qaşûlên karûbarên hêza rewayek pîroz in, ku xwedawend di destpêkê de, tê de pişkdar bûne, û paşê ademîzadan ew şopandine û karûbarên wan di demên pîroz de, di kesayetiya xwe de, dûbare kirine. Lewma qaşûlên hêkên Çarşemê ciyekî evradar û payebilind di rabûnûrûniştina êzîdiyan de, digire. Êzîdî di dema Çarşemê de/ Çarşema hêkan, qaşûlên hêkên ku di evradariya dema Çarşemê de, hatine şuştin, li ser dexil, zad, bexçe, bax, zevî, dehil û meyweyên xwe direşînin. Herweha wan qaşûlên pîroz hildigirin govên tebyan , daku bi ser serê pez, dewar û lawirên xwe de, werbikin. Daku di serencamê de, her tişt bi hêzdariya rewaya hêkê, bi dayîn, xêrûbêr û bereket bibe.

Anku mebest ji dûbarekirina vê seqayê di dema Çarşemê de, li gor bîr û baweriya êzîdiyan ewe, ku xwedawendên vê dema pîroz/ xwedawendên Çarşemê wê hêzdariya rewayeke xwedawendane xêr û bereketa bax û şîniyên wan û herweha pez, dewar û lawirên wan, zêde bike.

Ji ber vê yekê û ji ber puxteyiya nîşanewî; ya bi hêz di hêkê de, û herwisa pîroziya wê di dema Çarşemê de, ev cejn/ cejna Tawisî Melek hindek caran wek cejna hêkan tê liqelmdan. Eger ku em bi çavekî lêkolîneweyî û bi hûrbînî seqa, rêûrism, rewîştûtîtalên vê dema pîroz, bixwînin, wê gavê em dê bibînin, ku çendî têkildariyeke bi hêz di navbera hêkê de, wek simbola hêzdariya rewayê û enerjîya cinsî, û herweha zewacê de, wek simbola karûbarên afrandina pîroz, heye. Ji vê têkildariyê diyar dibe, ku meha nîsanê/ meha dema pîroz, çima hem wek meheke evradar û hem jî wek meha gunehan, di rabûnûrûniştina êzîdiyan de, tê pejirandin. Nîsan di mîtolojiyê û kelepûrê êzîdiyatîyê de meha herî bayexdar û pîroz e. Herwisa ew wek meha heramkirina zewacê û seqayên cinsî li ba êzîdiyan tê liqelmdan. Çimkî Nîsan di demên destpêkê de, wek meha hevgihandina xwedawendan û herwisa zewca wan ji hev, dihate terxankirin. Bi vî awayî nîsan di rêûrism, rewîştûtîtal, dabûnerîte û rabûnûniştina êzîdiyan de, dikare wek meha yadîkirin û bibîranîna zewaca dîstpêkane/ zewca xwedawendane, werê famkirin.

Di serê sala Babîlonan de/ EKÎTO/TEKLÎMTO, anku di destpêka meha Nîsanê de, li angorî salnameya Babîlonî, seqayên rewaya cinsî (yên pîroz), bi xweşiktirîn xeml û coşa xwe ve, dihatin dûbarekirin. Di serê sala nû de, Eştar/ xwedawenda dê bi yarê xwe re/ Temûz radizê, û Padîşah vê zewaca mîtiyane, bi yekîtiyeke seqayane bi giyanê xwedawendan re, dûbare dike. Wate ew yekîtiyeke giyanewî bi cêrîkê re/ fexra perestgehê; ya ku nûneriya xwedawendan li ser erdê dike, di holîkeke veşartî de, li ser textê tidarka xwedawendan, li dar dixê. Çimkî zewac û yekîtiya xwedawendane rewayê ji erdê re, gerantî dike. Lewma dema ku „NINLÎL“ bi „INLÎL“ re, bi yek dibû, baranê dest bi barandinê dikir. Ev rewa bi xwe, zêdetir dibe, dema ku yekîtiya padîşah; ya şadîmanwerî/ yekîtiya jin û mêran li ser astekî ademîzadane li erdê, dest pê dike. Weha cîhan/ gerdûn bi dûşopandin û zehirpêkirina her zewaceke pîroz/ zewaceke xwedawendane, xwe nû dike. Çimkî zewac jidayîkbûna salê dûbare dike, û pê re rewa, xêr û bereket, kêfxweşî û şadîmanî, dibare⁶. Lewma zewac ji bo her êzîdiyekî/ êzîdiyekê di meha Nîsanê de/ meha karûbarên zewaca pîroz/ meha Çarşema sor, wek gunehê mezîniyê tê liqelmdan. Çimkî Nîsan, wek ku ji mîtolojiya êzîdiyatîyê(bi taybetî jî mîtolojiya Çarşema sor) û herweha berî wê ji mîtolojiyên Mezopotamya, diyar dibe, meha rewa û zewaca pîroz e. Di vê mehê de, xwedawendan dest bi karûbarên afrandina pîroz kirin e.

Di her buharê de, paş ku şkarte û şovên cotkirî, tovên xwe hembêz dikirn, jin û mêrên Somer kêf û şahî li dar dixistin, ji bo pêşwazîkirin û jinûvevejandina TEMÛZ, yê ku dihate pîrozwergirtin, hem wek xwedawendê zarokdayin û jidayîkbûnê, hem jî wek simbola mêraniya, ku xwedawenda erdê bi bêrîkirina wê dihate sotan⁷.

⁶ Mirsya Ilyad: Istûret elewd elebedî, wergerandina bo zimanê erebî Nîhad Xeyate, Dar Telas, Dîmeşq 1987, R. 54

⁷ Pol Frîşawir: Elcins fî elalem elqedîm, wergerandina bo zimanê erebî Fayîq Dehdûh, Dar Nînewa, cihê weşanê nediyare, 1999, R. 68.

Bê goman ji evradariya meha Nîsanê re, di kelepûrê êzdiyatîyê de, dûmahîkeke mîtiyane heye: Êzîdî dibêjin: „Nîsan bûka salê ye, çu bûkan di ser xwe re qebûl nake“⁸.

Eger ku ji navan re, nîşan û dûmahîkên mîtolojî û simbolî, di kultûr û çandên gelan de, hebin, wê gavê em dê bibînin, ku evradariya meha Nîsan li ba êzdiyan ,wexta ku ew „Nîsan“ê wek navekî xweş û heskirî ji bo zarokên xwe; yên mê, hildibijêrin, di radeya xwe ya herî bilind de ye.

Bi ser vê qasê de jî, Nîsan dikare wek meha vehisandina pîroz û nêzîkbûna ber bi xwedawendan ve, werê qebûlkin. Ew meha/dema kirde û karûbarên pîroz e; yên ku xwedawend pê rabûne, pê radibin, û dê hîn pê rabin. Ew meha dûbarekirina demên destpêkane ye, yên ku xwedawendan tê de, bi karûbarên yekemîn afrandina pîroz, rabûne û herweha ciyografîya wê dîrok kirine. Nîsan bi giştî, meha puxtekirina xwedawendane û destpêkên pîroz e.

Ji ber ku êzdiyatî wek yek ji olên xweristyane û herî kevnare di herêmê de, tê liqelemdanê, lewma gerdûn li gora fîlosofîya wê, bi mirov û xweristê re, di rêya yekîtiyêke guncaw û kamil de, sêgoşîyêke kosmolojî, a herî tekûz, pêk tînin: Gerdûn ↔ Xwerist ↔ Mirov
Di dema ku ji mirovê/a êzîdî tê xwestin, ku karûbarên jiyana xwe; ya rojane, bide paş û gîro bike, daku bêdengîya cîhana xwedawendan, bi qelebalixa xwe, birîndar neke, di heman demê de, mirov dikare wî/ wê bibîne, ku ew çawa di heybeta xweristê de, çogan datîne, û herweha ji surr û namûsa wê; ya herî evradar re, perweste dibe. Çimkî li gora bîr û baweriyên êzîdiyan, xwerist bi xwe jî, bi karûbarên xwe; yên pîroz ve, mijûle, daku di serencamê de ew karûbarên xwedawendane; yên ku xwedawendên destpêkê, di demên destpêkê de, bi wan rabûne, tamam û tekûz bibin.

Ji ber vê yekê, karûbarên kiştûkalî û herweha kolana erdê, di meha nîsanê de, ji bo her êzîdiyêkî/ ê, li gora urf, adet û kultûra êzdiyatîyê, wek gunehkî mezin tê hesabkirin. Kolan yan jî „birîndarkirina“ erdê, û herweha birrîn, kesixandin, û çinîna dar û beran, di vê demê de, ne karekî rewa û destûrdayî ye, çimkî her tişt di vê dema pîroz de, dema çarşemê/ dema nîsanê, di dema karûbarên pîroz, rewaya pîroz, dayin, rewa û beraketa pîroz de ye. Bê guman, li paş heramkirina kolana erdê, di meha nîsanê; ya herî evradar de, paşxaneyêke mîtolojî di rehên dîroka herî dûr de, heye. Efsane û mîtolojiyên berî „Quran“ê, wek têksteke nivîsandî, qedir û bayexêke giranbuha dayine hizra rewayê, di bîr û baweriyên mirov de, ku li aliyekî wê hêz û harbûna xweristê bû, û li aliyê din jî hêz, îmkan û qabiliyeta jinê bi xwe bû, li ser zehrêkirin û herweha pêşbirkiya bi xweristê re. Weha dîtina hestiyar kartêkirin û bandora xwe, li ser bîra gelek miletan kir, anku jin mîna xweristê didîtin û weha jî ew fam dikirin û pê re diketin guftûgoyê. Di her afrîdeyekî ji me de, mirov dikare şûneşop û sîmayên guhertin û cihêrengiyê, di her kêlik û demê de, bişopîne. Lewma jin wek erda me; ya dayîkane, û erd jî wek diya me; ya herî destpêkane û jina mişt rewa û bê hempa, hate hesabkirin û herweha qebûlkin⁹.

Lewma hevtemtêlî û hevkesimiyeke bê hesab, di navbera „kolana erdê“ û „kolana jinê“ de, di mîtolojiyên olên mezin de, bi awayekî berz û eşkere xwe dide pêş.

„Înana“ somerî(ku wek xwedawenda dê, ya herî destpêkê, di herêma Mezoopotamya de, hatiye naskirin), weha îlana birçîbûna xwe; ya cinsî, dike, û berzûrî aşîqê xwe „Temûz“, dibe, daku mêyetiya wê bikole:

*Erê ji bo min; ji bo mêyetiya min;
ji bo mesîla li baniyan, kombûyî;
ji bo min,*

⁸ Heta roja îro, êzîdî vê zargotinê wek erkeki oldarî, li bîra xwe tînin û herweha wê di rabûnûrûniştina xwe; ya rojane de, pêk tînin. Lewma Dema Nîsanê li ba êzîdiyan, ji bo zewacê wek demeke pîroz, gunehgiran û tabûwane, tê dîtin

⁹ Mahmûd, Ibrahim: Alcins fî alqran, weşanxana Riyad Alrayis, London, 1994, R.92.

*ez; ya keçik,
wê kî ji min re, bikole?
Mêyetiya min!
Zeviya avdayî, ji bo min.
Ji bo min, ez; ya padîşah,
kî wê ga di dera ha de, bi cî bike?*

Paşê bersiv jê re tê:

*periya payebilind,
Padîşah wê ji bo te, bikole,
DOMOZÎ; yê padîşah,
wê ji bo te, bikole*

*Ew jî bi şewat bersivê
Vedigerîne:*

*De mêyetiya min bikole,
ey hevalê dilê min.¹⁰*

Lewma gunehê bawermendê êzîdî, di „kolana jinan“ û herweha pêkanîna rêûrismên zewacê de, di dema nîsanê; ya çarşembeyî de, bi qasî gunehê wî di kolana erdê de ye.

Bi vî awayî kolan, di hemî mîtolojiyên dêrîn de, ji kolana erdê, heta bi kolana mêyetiyê(...) wek karekî oldarî û pîroz hatiye wergirtin¹¹.

Çarşma rengan

Yek ji beşdarbûnên din; yên vê dema pîroz/ dema çarşemê, pêwîstiya beşdarbûna rengan di seqayên wê de ye, çî beşdarbûna rengan di hûnana tayên „Basimbarê“¹² de, çjî di hêkên cejnê de.

Pêwîstiya amadebûna rengane, di seqayên vê cejnê de, di serencamê de, hewldaneke ji bo amadekirina xwedawendê vê cejnê bi xwe, wate Tawisî Melek/ Domoziyê êzîdî, wek afrênerêkî rengîn; ku di demeke destpêkane de, wek dema çarşemê, ji karûbarên afrêneriyeke xwedawendane û rengîn tewaw bûye: Afrandina gerdûneke rengîn, xweristeke rengîn, û mirovekî rengîn.

Ev sîmayên Tawisî Melek, wek „afrênerêkî rengîn“, heta radeyeke bilind, dişibihin sîmayên Domozi/ Temûzê mezopotamî; yê ku di mîtos û efsaneyên somerî û babîlonan de, di qîlafet û tenga xortekî ciwan, di destpêka temenê xwe de, ku bi rengên kesk û sor xemilandî, û li ser piştê Teyr Tawisekî siwar, dihate saloxdanê.

Ev herdu reng jî, ji aliyekî ve, kurtasî û puxteyîya herdu demên domoziyane ne: Dema zer/Dema xatixwestina pîroz/ Dema payîzê/ Dema dahatina domoziyane bo cîhana jêr/ Cîhana taristanê/ Cîhana mirinê, û dema kesk/ Dema pêşwazîkirina pîroz/ Dema buharê/ Dema hilkişîna domoziyane bo cîhana jor/ Cîhana ronahiyê/ Cîhana jiyane, ji aliyê din ve jî, ew kurtasî û puxteyîya xwedawendiya domoziyane, ya rengîn in, wek xwedawendekî giştî, tgekûz û kamil, ku karîna wî li ser her tiştî karîneke reha, bê sînor û bê hempa ye.

Bê guman, ji rengan û wateya wan; ya sembolî re, rûberêkî berferêh, di xerîteya mîtolojiya êzîdiyîyê de, heye. Pîrê caran, mirov dikare bi sanahî, di qewl, dûwa, dirûze, û beytên êzîdîyan de, rastî van wişeyan were: „Durra sipî“, „Durra zer“, „Destê kesk“, „Êzî yê zer“, „Êzî yê sor“,.....htd:

¹⁰ Kraim, Samuel, Xeyata, Nîhad(Werger): Înana we Domozi/Tiqûs alcins almuqedes inda alsomerîyîn, weşanxana somer, Qibris, 1986, R.92.

¹¹ Alrebîho, E. Tirkî: Alinf wel muqedes wel cins fi almîtolojiya alislamiya, almerkez alseqafi alarabî, Beyrût, 1995, R. 87.

¹² Basimbar: Benekî pîroz e, ji tayên çarşembeyî û rengên pîroz (Sor, sipî, zer, kesk...), bi awayekî mukum û ciwan, tete honandin. Paşê wek sembol û rîsma çarşema Tawisî Melek, êzîdî, ji heft salî heta bi heftê salî, zend û bendên xwe bi wê bazin dikin, û herweha serderîyên malên xwe, cî û ziyaretgehên xwe, bi wê dixemilînin.

Ji dûwa êvarê:

*Hûn bidin xatira durra sipî ye,
melekê bêrî ye,
surra Êzî ye,
ya Şêşims, li dîwana siltan Şêxadî,
tu xwe û me jî, bike hêvî ye.
Hûn bidin xaitra durra sor e,
Êzdînê mîr e,
qublet elbidûr e,
ya Şêşims,
bang û hawara me bêt melekê jor e.
Hûn bidin xatira durra zer e,
ax, av, ba, û agir e,
erd û ezman û ber e,
Êzdînê mîr û herçar surr e,
ya Şêşims,
tu bangîna mala xwe û me jî wer e¹³.*

Ji şehda dîn :

*kaniya sipî muhra min e,
.....
qublet elbidûr qubleta min e,
melek Şêx Sin baxoyê min e,
Şêxmûsê sor xwedanê min e¹⁴.*

Herweha çavên bawermendê êzîdî, hînî perde, û alên rengereng, yên ku bi rengên xwedawendên wî hatine vedan, bûne: Wek „Perdeyên Şerfedîn”, „Perdeyên Şêxadî”,... htd. Ziyaretgeh û perestgehên êzîdîyan jî, wisa biryar dane, ku qub û helêlên wan bi valahiyên ji rengên xwedawendane/ xwedayên rengane, werin rapêçan, daku serdanvanên wan bişên bi sanahî rêya wan bigirin.

Çarşema genim

Seqayeke din ji seqayên ,ku hêjayî bas û lêkolînê ye, û herweha di sewiyeteke evrdar û berz de, di cejna Tawisî Melek de, tê pêşwazîkirin û pîrozkirin, seqaya pêjandina kulîçe û sewikan e. Ev seqa jî, Domozi/ Temûz ê ku bi aliyekî ji aliyên xwe ve, wek xwedawendê ruh û giyanê genim, di mîtolojiya somerîyan de, bi taybetî, û mîtolojiya mezopotamiyan bi awayekî giştî, dihate naskirin û liqelemdanê, li bîra mirov tîne.

Keşîfîkirin, biservebûn û bidestxistina hunera çandiniyê, ji bo mirovê çerxê kevirî, ne di rêya kiryarekî mirovane re, rû daye, belkû bihtir di rêya alîkariyeke xwedawendane re. Û sinbila genim; ya herî destpêkane, ku wî/ wê çand, tenê wek sembola laş û qilafetê xwedawendê kur(Domozi/ Temûz); yê kuştî, dihate pejirandin, ku xwedawenda dê (Înana/ Eştara), ew hinartibû cîhana jêr, daku tûreke çandiniyê, ji nuh ve, bide destpêkirin, û weha bidome heta hetayê.

Weha ew xwedawendê mirî; yê sax e, herwekî çawa ew xwedawendê sax; yê mirî ye; yê ku di payîzê de, xwe bredide binê erdê, û paşê, careke din, hildikişe jor, daku bi xwe re keskahîya buharê bîne. Bi vî awayî, wî(Domozi/ Temûz) gera jiyana xwe, ya salane, ku jiyana cihnişînên destpêkê û herweha ol û seqayên wê, rastûxo pê ve girêdayî bû, tamam dikir¹⁵. Weha Temûz (Domozi) / gayê mangane/ heyvane, mîna Eştara kesk, bû xwedawendekî şînahî û peryoda çandiniyê. Ew Temûzê kesk e, xwedayê hişînkirin û peryoda çandiniyê ye.

¹³ Dr. Xelîl Cindî, Kovar Laleş, hejmar 1ê, Duhok, 1993, R.78.

¹⁴ Min ev sebeqê ji kasêteke teyibê, ku bi dengê hêja Feîr Hecî, hatibû tomarkirin, wergirtiye.

¹⁵ Alsewah, Firas: Luguz Eştara, weşanxana Alladîn, şam, 1996, R.281.

Ew xwedawendê sax; yê mirî ye, herwekî çawa ew xwedawendê mirî; yê sax e; yê ku di payîzan de, xwe berdide zikê erdê, û paşê ji cîhana taristanê, bi hatina buharê re, ji nû ve tê vejandin, û bi xwe re, ew xêr û bereketa malzaroka tarî; ya ku ew jê pijiqiye, tîne der¹⁶. Lewma amadebûna Kulîçe û Sewikan, wek seqayekê ji seqayên pêşwazîkirin û pîrozwegirtina xwedawendê vê dema pîroz anku xwedawendê cejna çarşemê/ Tawisî Melek, berî her tiştî, ew simbola amadebûna genim e, wate amadebûna xwedawendê genim; yê herî pîroz Domozi/ Temûz, yan jî tawisî Melek di rewşa xwe; ya sax a mirî de/ wek xwedawendê sax; yê mirî.

Genim di hizra êzîdîyan de, ”afrîdeyekî” evradar e û ruh û surra Tawisî Melek di ber de ye, yan jî mirov dikare bi wateyeke din bibêje, ku herduwan kiras, di hev û din de, wek du ruhên xwedawendane, guherandine.

Ji ber vê yekê danûstandina mirovê êzîdî, bi genim, nan û zad re, danûstandineke sirf bawermendane ye, ku genim di kokê de, wek aliyekî ji ol û îmanê di wê danûstandinê de, berz dibe. Ji ber vê evradariya genim û pîroziya ruhê wî; yê xwedawendane, di ola êzîdiyatiyê de, mirov dibîne, ku beşdarbûna genim, wek surreke xwedawendane, di gelek rê û rism û herweha zad û xwarinên demên pîroz de, beşdarbûneke desthilatdar û berz e: wek amadebûna xwarina Sumatê, di piraniya cejnên de, û Pêxûn/ Poxîn, Qelatek/ Qelandek, û Çerxûsê, di cejna Xidir Elyas de, û herweha keşk û Sewik jî, di piraniya cejnên de¹⁷.

¹⁶ Heman jêder, R. 277.

¹⁷ Dr. Cind, Xelîl: Nehwe marîfet heqîqet eldiyane elêzîdiye, weşanxana Rabûn, Upsala, 1998, R. 95.